

蠡縣志卷之四

爵秩志

蠡之在漢也有侯籍之榮其在明也有戚畹之貴
吏冊班班昭然可考仕於斯邑爲秩官官有惠澤
及民則爲名宦非皆請祀名宦也祀名宦者傳載
之矣惟自康熙庚申以來邑志失修故多湮沒或
見於他說僅存其姓文獻無徵無如何也嘉慶而
後則備載焉以俟後人之論定增入名宦者數人
大抵皆剔蠹舉廢無愧循良之幹濟者也爲令長
者可勿奮乎

侯籍

漢

關內侯趙廣漢本始元年詔論定策安宗廟功封關
內侯見名賢志

平昌侯王無故

樂昌侯王武

博平君王媼漢宣帝外祖母也帝母翁須謚悼后地
節三年求得後母王媼媼男無故無故弟武皆隨
使者詣闕時乘黃牛車故百姓謂之黃牛媼媼言
名妄人家本涿郡蠡吾平鄉年十四嫁爲同鄉王

更得妻更得死嫁爲廣望王廼始婦產子無故武女翁須於是御史大夫任宣奏王媼悼後母明白上皆召見賜無散武爵關內侯制詔賜外祖母號爲博平君以博平蠡吾兩縣戶萬一千爲湯沐邑封舅無故爲平昌侯武爲樂昌侯食邑各六千戶初廼始以本始四年病死後三歲家廼富貴追賜諡曰思成侯

錢天錫曰漢呂后之妹呂須封爲臨光侯蕭何夫人封爲鄼侯厥後東海恭王疆三女小國侯皆以婦人封侯不獨宣帝也而推恩外祖母自宣始於

是博平以後有新野君之屬尊其私親亦自宣始
於是哀有共皇桓有孝穆皇孝崇皇靈有孝元皇
孝仁皇遂濫觴矣豈襁褓收繫女徒阿保之恩未
免沾沾私暱鮮能以禮自克與

樂昌侯王商

嗣父武爵見名賢志

險瀆侯又封關內侯齊蓋廟碑見藝文志

蠡吾侯劉翼河間孝王開之子也開以永元二年封

分樂成渤海涿郡爲國元初六年鄧太后徵濟北

河間王諸子詣京師奇翼美儀容以爲平原懷王

後留京師歲餘太后崩安帝乳母王聖與中常侍江京等譖鄧騭兄弟及翼云與中大夫趙王謀圖不軌闕覬神器貶爲都鄉侯遣歸河間翼於是謝賓客閉門自處永建五年父開上書願分蠡吾縣以封翼順帝從之遂封爲蠡吾侯

蠡吾侯劉志翼之子也襲封本初元年太后欲以女弟妻志徵志夏門亭會大將軍梁冀進毒弑帝遂迎志入卽帝位太后猶臨朝追尊河間孝王爲孝穆皇蠡吾侯曰孝崇皇陵曰博陵尊母區氏爲孝崇博園貴人建和二年留博陵奉翼後尊翼夫人

馬氏爲孝崇園貴人以涿郡之良鄉固安河間之蠡三縣爲湯沐邑和平元年梁太后崩乃就博陵尊后爲孝崇皇后遣司徒持節奉策授璽綬齋乘輿器服備法物官曰永樂置太僕少府以下皆如長樂宮故事又置虎賁羽林衛士起宮室分鉅鹿九縣爲后湯沐邑元嘉二年崩以帝弟平原王石爲喪主歛以東園畫梓壽器玉匣飯含之具禮儀制度比恭懷皇后詔安平王豹河間王建渤海王曄長社益陽二長公主與諸國侯三百里內者及中二千石令長相皆會葬復土繕廟合葬博陵

義吾侯劉惔桓帝之弟也帝卽位以惔嗣侯及渤海

王鴻薨立惔爲渤海王後生逆謀貶爲癭陶王

事見

藝文

志

後唐

隴西郡王李茂貞本姓宋氏名文通爲博野軍卒戍鳳州後以功自扈驛都頭拜武定軍節度使賜姓李名茂貞久之加拜尙書令封岐王及唐亡梁太祖卽位諸侯之强者皆相次稱帝惟茂貞但稱岐王開府置官屬出入擬天子而已有地二十州當梁末年有地七州而已莊宗已破梁茂貞稱岐王

上牋以季父行自處莊宗以其耆老甚尊禮之改
封秦王同光二年卒諡忠敬

戚晚

明妃栢氏明天順八年三月十一日選入內庭自幼
恪遵姆教及事英宗皇帝夙夜勤慎無少愆違成
化二年三月初十日冊封爲賢妃生子一冊封爲
皇太子早卒諡悼恭諡妃曰端順妃父栢珍東和
社人以妃貴授錦衣指揮使

湯大紀女明隆慶三年四月初八日選入皇太子內
庭次年賜名御子父大紀授錦衣百戶

駙馬都尉冉興讓明萬厯三十四年以人材入選尙
壽甯公主

名宦

元

郭克明知蠡州以教化風俗爲已任覲文廟湫隘破
淫祠取其資捐俸改作秋毫不派民置腴田八十
畝供師生廩饌擇經傳格言稽國朝典制爲簡冊
社給一部俾之誦法課農桑均賦役却中山應辦
之協濟輟河倉修葺之冒徵止糧草之聚斂去遞
運之橫科獄訟稀少盜賊屏跡流民復業戶口日

增至正壬午進朝請大夫提舉司事累進中大夫
濟南路總管卒贈嘉議大夫上輕車都尉追封太
原侯明嘉靖十三年祀名宦

王克勤字士勉碣石人禮部尙書從義長子元至正
戊子以儒貢授奉訓大夫知蠡州下車密訪民間
利病變前守苛政及期政教大興民有兄弟爭訟
開譬以孝弟之道其人感泣而止滹沱爲患歲檄
葦草里甲愁嘆視版籍以均其賦聞風復業者七
十餘戶弭盜有方捕廝濫胥悉屏刑科打捕鷹房
數輩凌虐村民悉斥絕之誘進弟子員增學田百

畝祭器始備時屆涼秋夜永親率士子於退廳講
堂肄業訖季春而止歲乙丑久雨河漲隄決秋禾
一空力請蠲繭絲田稅賑濟饑乏至正十年暮春
迄夏不再齋沐禱祠輒應歲遂有秋躬行阡陌教
民畦上植桑田疇開闢原野陰翳蠶利倍於曩時
郡北有梁林隙地一區措置市之建立義塾初至
有慈烏巢庭槐其雛方鵲踰再期羣烏碁布於上
及去任烏遷於他所崇正十三年祀名宦

明

古端陝西咸甯縣監生知蠡縣清廉剛明吏畏民服

時桀民十人號十虎一日盡收捕伏法刁風頓息
毛紀陝西涇源縣監生天順中知蠡縣立心純實蒞
政勤能修理城垣民賴以安

吳鳳鳴華亭進士成化間任縣事持身廉慎處事詳
明威震豪雄不畏權勢卒於官祀名宦

張祺武功衛人繇進士成化間任縣事勤能不怠營
建有方祀名宦

何琛四川成都人繇進士宏治三年任縣事公明仁
愛民敬服之擢監察御史祀名宦

吳堂常熟人繇進士宏治十三年任縣事存心仁恕

蒞政廉能擢監察御史

胡守約四川合州人正德中任縣事時流賊破城被執不屈賊竟殺之

金鏡上元人正德間任縣事蒞政勤敏時流賊猖獗修城濬濠民賴以安

盧問之山西朔州人正德間任縣事救災恤民鋤强抑暴令行禁止境土肅然

王得成興平人正德中任主簿性剛直時中官用事家人有犯法者毫不肯貸以此去官歸日一僕一驢外無長物祀名宦

李秉彝字天常山西石州人繇進士嘉靖二年任縣事方介慷慨有大志嚴於懲惡一時頑民屏跡均田平賦流移歸者千餘戶編徭輕重適宜所向稱便民至今思之祀名宦

周道字大經河內人繇進士嘉靖六年任縣事寬仁識大體清約自守如寒士教民爲善境無盜賊獄無重囚愷悌之德民咸思之擢監察御史祀名宦張鳧山東萊陽進士嘉靖間任縣事爲人沉毅力行實政嘉靖十年修縣城創建磚牙牆高堅峻整民甚賴之陞戶部主事

李復初字學甫號對霍山西洪洞舉人嘉靖十一年
任縣事器猷宏博學術晶瑩明燭幽隱力除奸弊
士有械朴之詠民溢甘棠之思修葺縣志擢監察
御史

楊鎬字京甫號滄嶼河南商邱進士萬厯十七年任
縣事潔手捷才舊例均徭六則以上丁差外加派
門銀數多累重申請除革民困以蘇擢監察御史
士民爲建祠立碑

張瑤號玉臺山東曹州人繇進士任縣事爲政方嚴
人不敢干以私士民豎碑附滄嶼楊公祠

周之基號鴻區湖廣湘潭人繇進士萬曆十八年任
縣事節費愛民講學課士政興務舉士服民安擢
刑部主事

劉濟字未之號殷築合肥縣人繇進士萬曆二十七
年任縣事潔已愛民興學造士賑恤荒獨作粥救
荒必躬親嘗之

王國賓字瀛之號華亭山東茌平人繇進士萬曆三
十二年任縣事德性溫醇操守嚴潔捐百金濬築
唐河除數郡之災丙午歲蝗蝻生爲文祭告蝻輒
負於蝗而去見八蜡廟碑記丁未大水捐俸二百